

24/10/1998

Kesatuan guru sambut baik tambah peruntukan

PEMIMPIN kesatuan dan persatuan guru menyambut baik langkah kerajaan meningkatkan peruntukan pendidikan daripada RM12.458 bilion kepada RM13.5 bilion dalam Belanjawan 1999 walaupun negara sedang mengalami masalah kegawatan ekonomi.

Mereka menyifatkan langkah itu membuktikan keprihatinan kerajaan dalam membangunkan sektor pendidikan dalam usaha menghasilkan lebih ramai tenaga mahir pada alaf akan datang.

Presiden Kesatuan Guru Melayu Malaysia Barat (KGMMB), Abdul Rahman Daud, berkata, pihaknya menyambut baik langkah kerajaan meningkatkan peruntukan pendidikan sejajar dengan matlamat untuk menjadikan Malaysia sebagai pusat kecemerlangan pendidikan.

Katanya, dengan peruntukan tambahan itu, membuktikan kesungguhan kerajaan memberi pendidikan berkesan kepada rakyat.

"Berdasarkan keperluan pendidikan berkesan dari sekolah bestari dan kewujudan koridor raya multimedia, peruntukan sebanyak itu perlu dimanfaatkan dengan sebaik-baiknya."

"Peningkatan pengambilan pelajar ke institusi pengajian tinggi awam (IPTA) tempatan dari 77,600 kepada 84,000 tahun depan akan memberi manfaat kepada lebih ramai pelajar dari seluruh negara," katanya.

Perdana Menteri, Datuk Seri Dr Mahathir Mohamad dalam pembentangan Belanjawan 99 di Parlimen semalam mengumumkan, kerajaan menyediakan peruntukan sebanyak RM13.5 bilion untuk meningkatkan prasarana dan kemudahan sokongan serta pembangunan kurikulum.

Abdul Rahman bagaimanapun, menyarankan supaya kerajaan tidak meminggirkan pelajar kursus sastera dalam usaha meningkatkan penguasaan sains di kalangan pelajar masa kini.

Katanya, dengan penubuhan fakulti perubatan Universiti Islam Antarabangsa (UIA) di Pahang pula diharap akan dapat menampung kekurangan tenaga perubatan terlatih terutama di kawasan luar bandar.

Sementara itu, Yang Dipertua Persatuan Kebangsaan Pengetua Sekolah Menengah Malaysia (PKPSMM), Mohd Taib Hussin, berkata pihaknya mengalu-alukan langkah kerajaan menambah peruntukan pendidikan terutama untuk meningkatkan taraf sekolah vokasional dan teknik.

Katanya, persatuan terbabit sebelum ini memang sering menyuarakan pandangan mengenai keperluan bidang kemahiran vokasional dan teknik itu.

Timbalan Presiden Kongres Kesatuan Guru Dalam Perkhidmatan Pendidikan Malaysia (Kongres), Mohd Kahiri Yahya, berkata kesatuan itu melahirkan rasa gembira berikutan tumpuan yang diberikan oleh kerajaan dalam bidang pendidikan.

Katanya, keprihatinan kerajaan jelas menunjukkan usaha untuk melahirkan tenaga kerja yang berpotensi di masa depan.

"Peningkatan peruntukan Tabung Pendidikan Tinggi Nasional (TPTN) kepada RM320 juta dalam belanjawan tahun depan dijangka dapat menyelesaikan masalah pembiayaan untuk ke IPT kepada pelajar yang kurang berkemampuan," katanya.

(END)